

BONERIANO®

Stòp di keda kompará bo mes ku otro hende, djis skohe pa ta felis i biba bo mes bida.

EDITOR:
Bonaire Communication Services N.V.

Djammers 28 mart 2023

Preis:\$1.00

BROTE MALESA MORTAL

Selebrashon 40 aña Telbo



Den fin di siman TELBO a kontinuá ku selebrashon di su 40 aniversario. Djabièrnè klientenan por a pasa tuma cupcake, miéntras ku djasabra e selebrashon a sigui ku bandanan lokal i di Kòrsou. ERA outéntiko ku tambe a kumpli 40 aña di eksistensia a deleitá esnan presente. Meskos tambe JC and friends i Ramsey Krips. Públiko a balia i gosa tur afó.

Kombatí pèstmentu sibernétiko

PAG 4

xerox™



OBERSI
ELECTRONICS
BONAIRE

SABADA 5000 TILES
BIG SALE
UP TO 70% OFF
\$6 p/m²

Shopping, Best Local BBQ, Bone Pop Up, Entertainment and Much More

GARTISH #1
KAYA BONGO # 8, NIKIBOKO ZUID

MANTENE BO
VEHIKULO OF
EKIPO DEN
KONDISHON
KU PIESANAN
KUMPRÁ NA NAPA



2X Double Points Tuesday!
ALL DAY EVERY TUESDAY!
Earn Double Points on your Club Card

Open Monday - Saturday 8pm to 4am | Sunday 7pm to 3am | (599) 717-3504
diviflamingocasino.com | ATM available

DIVI FLAMINGO CASINO

www.cityshopbonaire.com
City Shop Bonaire
+599 700.6442
+599 717.3666

City Shop
Smart shopping • Better living

Na rotònde di Hato

Obra di heru bentá kant'i kaya

KRALENDIJK -- Na rotònde di Hato tin un situashon ku ta lanta basta pregunta. Den pasado tabatin un obra di arte riba e

rotònde. Ta trata aki di un obra trahá di heru bieu, pero pa algun tempu kaba e obra ta bentá kant'i kaminda. Fundashon Bunita Bo-

neiru ta esun ku tabata enkargá ku e proyekto.

Den temporada di fin di aña a kita e obra pa pone dekorashon.

Entretantu nos ta drentando di kuater luna di aña.

A kita dekorashon di fin di aña i e obra ta praktikamente bentá kantu di kaminda. BONERIANO a trata na drenta den kontakto

ku e fundashon pa sa kiko ta bai pasa ku e obra mirando ku basta ta esnan ku a hasi donashon pa a laga traha e obra aki.

Te na momentu di imprenta no a logra drenta den kontakto ku esnan konserní.



WATER- EN
ENERGIEBEDRIJF
BONAIRE

Corporate Secretary

Werkzaamheden:

- Geeft gevraagd en ongevraagd advies aan de Board of Directors en het Management Team aangaande uiteenlopende onderwerpen.
- Is verantwoordelijk voor het opstellen en adviseren ten aanzien van inhoudelijke beleidsvoorstellen.
- Zorgt voor de organisatorische en inhoudelijke voorbereiding van de vergaderingen van de Board of Directors en de Raad van Commissarissen.
- Is verantwoordelijk voor het initiëren en voorzitten van diverse in- en externe bijeenkomsten.
- Ziet toe op het notuleren van diverse overleggen en/of notuleert zelf.
- Signaleert tijdig relevante interne en externe ontwikkelingen en beoordeelt de implicaties hiervan.
- Vertaalt relevante externe ontwikkelingen naar advies en beleid.
- Is in voorkomende gevallen lid van projectgroepen, treedt dan wel op als projectleider.
- Ressorteert onder de Board of Directors.

Functie-eisen:

- Je hebt een academische opleiding of een HBO+-opleiding op juridisch gebied.
- Je hebt minimaal 3 jaar werkervaring in een soortgelijke functie.
- Je beschikt over uitstekende schriftelijke en mondelinge rapportage- en uitdrukkingsvaardigheden in het Nederlands en in het Engels.
- Je bent vaardig in het maken en duiden van overzichten en het regisseren van besluitvorming en weet deze zorgvuldig te documenteren.
- Je bent in staat procesmatig regie te voeren op inhoudelijke onderwerpen.
- Je kan goed samenwerken met in- en externe stakeholders en hebt gevoel voor bestuurlijke en politieke verhoudingen.
- Je bent vaardig in het omgaan met vertrouwelijke informatie en je bent organisatiesensitief en omgevingsbewust.
- Beheersing van Papiaments is een pré.

Sollicitatie:

Indien u in aanmerking wenst te komen voor deze functie, ontvangen wij graag uiterlijk 18 april 2023 uw sollicitatiebrief met uitgebreide motivatie en Curriculum Vitae t.a.v. de afdeling Human Resources per e-mail: hr@webbonaire.com

Aanstelling:

De initiële aanstelling is voor een jaar met als doel een vaste aanstelling bij goed functioneren. Een aanstellingskeuring en assessment maken onderdeel uit van de sollicitatieprocedure.

Water- en Energiebedrijf Bonaire N.V. (WEB) is opgericht in 1963 en is eigendom van het Openbaar Lichaam Bonaire. Als 'exclusief' multi-utilitybedrijf is WEB verantwoordelijk voor duurzame, betrouwbare en betaalbare levering van drinkwater en elektriciteit aan ruim 10.000 huishoudens, bedrijven en organisaties en de verwerking van afvalwater en distributie van irrigatiewater op Bonaire.

De energie- en (afval)watervoorziening op Bonaire draagt bij aan duurzame ontwikkeling van het eiland. De bevolking neemt toe, het toerisme ontwikkelt zich, Bonaire is een groeimarkt. In de komende jaren zal er geïnvesteerd moeten worden. Alleen dan kan de betrouwbaarheid, betaalbaarheid en kwaliteit van de energie- en (afval)watervoorziening op een peil worden gebracht dat past bij het zich snel ontwikkelende Bonaire.

Het WEB telt ruim 150 medewerkers. Wij werken samen onder het motto: 'Let's do it together', in een sterk besef dat WEB van en voor de gemeenschap op Bonaire is.

Kralendijk, Bonaire • WEB-gebouw, Kaya Gresia #6 • P.O. Box 381 C.N.
T +599 715 8244 • F +599 717 8756 • Storingsdienst (24/7) T 9215
E info@webbonaire.com • www.webbonaire.com

let's do it
together



Saludo pa tur esnan ku ta lesa korant. Dios bendishoná kada un di boso.

Algun siman pasá mi a skirbi tokante un situashon di un persona ku a bai Medellin i kon nan a yud'é ku un difikultat ku e tabatin ku su bista. Mi tambe a eksperensia algu i ke kompartí ku boso.

Mi tabatin iritashon algu mas ku un luna bou di mi brasa. Mi no ta gusta bai dòkter. Semper mi ta pensa e kos mes ta kura. Anyway, mi a hunta e santu pomada di maravia i el a kura e herida pero a bolbe habri. Miéntras mi tabata na Colombia, mi di ta nèt, mi mester por topa algu ku ta kura e mankamentu akí. Mi a bai un Farmatodo, pegá ku hotèl un dia despues ku mi a pisa suela na Medellin. Kantidat di e tienda ei tin kasi tur skina na Medellin. Aya mi a haña un persona na bali. Mi a bis'é mi situashon i el a pidí mi si e por wak e feilá bou di mi brasa. El a sende lus di su selular pa e wak bon kiko ta e problema. Despues el a hasí mi algun pregunta, i a trese un remedi p'ami. El a bisa mi hunta e remedi mainta, mèrdia i anochi. Kere mi, despues di algun ora mi a lubidá mes ku mi tabata feilá bou di mi brasa. Momentu mi a realisá ku mi no ta sinti nada bou di mi brasa di e feilá, mi a bai wak den spil kon ta kuné. Sin gaña. un biá mi a hunt'é i ya e feilá kasi a kura. Mi a hunt'e pa seguridat dos dia i dato Piscadera.

Te dia di awe, danki Dios, bou di mi brasan ta stabil. E hòmber ku a yuda mi, ta un simpel bendedó. Sigur e tin su eksperensia, pero e mes por yudá bo hopi. Imaginá ta djis un simpel trahadó den un tienda. Nan ta pone hopi atenshon pa yuda e hende ku su difikultat. Esei ta di Colombia. No ta ami ta bisa, pero mayoria hende ku bishitá Colombia ta komentá.

BROTE MALESA MORTAL

KRALENDIJK – STINAPA na e momentu akí ta mira un brote di malesa di koral riba diferente ref den sentro di Kralendijk. Ku esaki e velosidat pa kua e malesa di koral ta amplia su mes i e kantidat di koral

afektá i muri, ta alarmante haltu. STINAPA ta hasi un yamada na tur usuario di Parke Marino pa evitá di hasi uso di e áreanan kontagiá.

Riba algun ref den sentro di Kralendijk a stipulá

un malesa di koral mortal ku ta plama lihé. Asina riba un mapa ku STINAPA ta kompartí por mira e área di e sitionan di buseo Town Pier, Calabas Reef i Eighteenth Palm, entre tantu a stipulá e malesa.

Pa e sitionan di buseo den bisindario manera Something Special, pa nort di e área ku plamamentu aktivo i Windsock, Corporal Meiss i Bachelor's Beach, pa sùit di e área, ta pidi pa ta kuidadoso.

Biòlogonan i rangernan di Parke Marino di STINAPA, ta tene e plamamentu di e malesa na bista. E organisashon di protekshon di naturalesa ta konsehá tur usuario di Parke Marino pa desinfektá nan ekipo tur dia.

Banda di esei, STINAPA ta konsehá pa sambuyá limitá te asta un parti di e isla pa dia. Mester evitá sambuyá den e áreanan kontagiá.



Konstrukshon KFC fase final

KRALENDIJK— Poko pero sigur trabounan di konstrukshon na KFC ta yegando su final. Despues ku pa algun luna e restaurant su parti pafó tabata den konstrukshon, awor por mira ku esaki praktikamente ta kla. Interior di e restaurant tambe

a haña un restorashon algun tempu pasá.

E restorashon ta parti di e akuerdo ku e kompania madre. Kada tantu temporada tur restaurant di e frankisia mester hasi kambio i adaptashon na e interior i eksterior di e restaurant.



28 di Mart 2023



“... Esun ku a manda Mi, ta huntu ku Mi.” (cf Huan 8,29a)

Hesus ta afirmá su relashon íntimo ku Tata; “Semper E ta hasi loke ta agradá su Tata ...” (cf Huan 8,29b) Konsekuentemente E ta sigur ku “Dios, su Tata ta huntu kuné.” (cf Huan 8,29a)

Di mes manera nos, komo hende batisá, tambe por desaroyá un relashon íntimo ku Tata i ku Hesus, ora nos disidí di kurason di hasi loke ta agradá Tata. Solamente e mester bira un sistema natural di nos eksistensia terenal. San Pablo a duna testimonio di esaki: “... Ya no ta ami ta biba, pero ta Kristu ta biba den mi.” (cf Gal 2,20)



Señor, pa bo grasias konsedé mi e don, di desaroyá un relashon íntimo ku Bo.

1L Num 21,4-9; Salmo 102,2-3.16-20
Ev Huan 8,21-30



005999-522-4056



Un Snechil Pan



unsnechilpan

Entre mayornan ku entrada abou i yu di mayornan riku

Miedu pa repartishon den akohida di mucha

KRALENDIJK – E lei nobo di akohida di mucha BES por kondusí na un repartishon entre mucha di mayornan ku un entrada abou te pro medio i yu di mayornan riku. Dor di esaki GroenLinks tin miedu.

Sentro di akohida di mucha ku ta hasi uso di e kompensashon tumá den e lei, mester kumpli ku kondishonnan di kalidat i ta obligá pa mantené nan mes na e tarifanan stipulá dor di e ministerio. Ofresedónan

di akohida di mucha ku no hasi apelashon riba e kompensashon di gobièrnu, no mester kumpli ku e kondishonnan i nan mes por stipulá nan tarifa. GroenLinks ta puntra su mes sí esaki no ta un rísiko riba segregashon ku e ta trese kuné.

Otro partidonan tambe tin hopi pregunta tokante e proposishon di lei, asina a sali na kla for di preguntanan por eskrito komo preparashon riba e tratamentu plenario. ChristenUnie ke

sa por ehèmpel dikone nete kontra e konsehonan

ofisial, ta mantené na e kontribushon di mayor den

e e kostonan di akohida di mucha.



KPCN ta hasi apelashon na mayor

Kombatí pèstmentu sibernétiko

KRALENDIJK – Kuerpo Polisial Karibe Hulandes, KPCN, ta hasi apelashon na mayornan pa yuda kombatí pèstmentu sibernétiko. Resientemente e departamentu di krimén si-

bernétiko a risibí mas i mas notifikashon tokante algun kuenta di medio sosial riba kua hóbennan ta kulpa otro di vários kos i kaminda ta hasi komentario desagradabel tokante di otro.

Tentamentu di forma digital, meskos ku tur otro forma di tentamentu, por trese hopi fèrdrit serka e víktima. Mas ainda, e por tin un impakto mas grandi ainda ku tentamentu offline i por tin konsekuensia serio.

Mayoria biaha esnan ku ta hasi pèstmentu sibernétiko, ta skonde nan mes tras di e pantaya i nòmber di usuario. Tòg mayornan por atendé ku e tentamentu online i te asta yuda prevení ku e ta sosodé.

P'esei e departamentu di krimén sibernétiko di

KPCN ta hasi un apelashon na mayornan pa intervení. Esaki por di vários manera, mayornan por reportá usuaronan riba e site-nan di e medio sosial riba kua e tentamentu online a tuma lugá. Esaki ta posibel asta ora esun ku ta pèst ta anónimo. E medio sosial por ta Facebook, Instagram òf WhatsApp.

Tambe ta importante pa mayornan papia ku nan yu tokante nan komportashon riba medionan sosial, pero tambe na skol. -Banda di esaki por mèldu e tentamentu online tambe. Esaki por dor

di manda un mail na Cybercrime@politiecn.com òf dor di yama 715-8000 i puntra pa e departamentu di krimén sibernétiko.

Tentamentu online ta kastigabel na momentu ku mir'é komo menasa, diskriminashon, òf dañamentu di nòmber. Pues, ta posibel pa duna keho di tentamentu online. E situashon akí tin atenshon di e departamentu di krimén sibernétiko di KPCN. Tin investigashon andando pa saka afó ken ta tras di e site-nan akí. Tin konsekuensia pisá mara na esaki.



E aktividat tabata bon bishitá

Classis Music Board a presentá Podium Bonaire

KRALENDIJK — Djadumingu 26 di mart Classical Music Board Bonaire a organisá un edishon nobo di Podium Bonaire.

Artistanan a interpretá obranan klásiko i kontempóraneo riba piano, órganu, saksofon i kitara. Un atardi inspirá den e tempu

di pashon den preparashon pa e simannan promé ku Semana Santa. Obranan di entre otro Bach i Mozart a haña ritmonan karibense.



Despues ku avion di EZ Air a hasi aterisahe di emergensia na Cucuta

Pasahero a yega destinashon final

KRALENDIJK – E pasaheronan ku tabata bordo di e avion charter di EZ Air ku a sali di Boneiru pa Medellin djadumingu mainta, a yega nan destinashon final, despues ku e avion a konfrontá problema di preshon abou den kabina i mester a realisá un aterisahe di emergensia na Aeropuerto Internacional



Den Kaya Hubentut

Camilo-Daza na Cucuta.

Un avion di charter di EZ Air wikènt pasá riba un buelo entre Boneiru i Medellin djadumingu a realisá un aterisahe no-planiá na Aeropuerto Internacional Camilo-Daza na Cucuta, den e departamento Norte de Santander.

E aterisahe aselerá tabata nesario dor di un defekto den e sistema di preshon di e avion, ku a pone ku e avion mester baha pa bula na un altura mas abou.

Despues di e aterisahe na aeropuerto di Cucuta, a pone e pasaheronan, asegurado di ZVK, riba avion di un otro kompania di avi-

ashon, pa hiba esakinan nan destinashon final.

EZ Air ta lamentá e molèster kousá pa e pasaheronan en kestion, pero ta enfatisá ku siguridat di pasahero i tripulante, semper ta para na promé lugá.

Aktualmente un tim di EZ Air su departamento tékniko, huntu ku eksper-tonan di fabrikante Saab, ta hasiendo un análisis pa averiguá kiko a kousa e desperfekto tékniko.

Ta premirá ku e avion lo keda pará algun dia na Cucuta, promé ku por integrá esaki bèk pa ehekutá su buelonan regular.

Neishi abeha formando peliger

KRALENDIJK -- Habitantenan di Kaya Hubentut den Rincon ta pidi yudansa di instansianan konserní. Den un palu den e kaya, tin un neishi basta

grandi di abeha ta formando.

E peliger ku habitantenan ta premirá, ta ku Dia di Rincon ta na kaminda i e neishi por forma peliger pa

esnan ku para nan outo den besindario. Habitantenan ta hasi apelashon na instansia òf personanan ku por yuda kita e neishi akí promé ku e sigui bira mas grandi.



E ta bira representante spesial

Rijna ta baha komo Gezaghebber

KRALENDIJK – Edison Rijna dentro di poko ta baha komo Gezaghebber di Boneiru i ta bira representante spesial na Karibe Hulandes pa fondo di Union Europeo, fondo di Nashonnan Uní i asuntunan ekonómiko, pa loke ta trata Latino América. Dia 18 aprel Rijna ta asumí su funshon nobo i na mes momentu ta baha komo gezaghebber. Esaki Sekretario di Estado, Alexandra van Huffelen di Asuntu Interno i Relashon di Reino, a anunsiá.

Ku su nombramentu

komo representante spesial den e añanan binidero, e gezaghebber aktual di Boneiru, ta bai enfoká entre otro mihó aksesu na fondonan di Union Europeo i Nashonnan Uní, pa e islanan di Karibe Hulandes, Boneiru, Saba i Sint Eustatius. E lo sòru di mantené kontakto ku Komishon Europeo na Bruselas i organisashonnan afiliá na Nashonnan Uní ku ta re-levante pa Karibe Hulandes. Akí e ta bai identifká proyektonan ku lo brinda oportunitat nobo na e islanan. Banda di esei,

komo representante spesial pa relashon ekonómiko pa Latino América, Rijna ta bai guia mishonnan ekonómiko pa i di Latino América i América Sentral. Meta di e mishonnan akí ta pa duna kompania i otro organisashonnan di Karibe Hulandes mihó aksesu na merkadonan den serkania i pa lanta interes serka paisnan den bisindario pa invertí i hasi negoshi na Karibe Hulandes. Un volúmen mas grandi di hasi negoshi i invertí, ta yuda fortaleza ekonomia di e islanan.

Gran nifikashon

Sekretario di Estado van Huffelen ta entusiasma ku e nombramentu: “Mi ta hopi kontentu ku Rijna a asepta e reto akí. Ku su vários año di eksperensia komo gezaghebber i ku un ret internashonal amplio den region, mi ta konvensi ku komo representante spesial e por ta di gran nifikashon pa e islanan i Hulanda.”

Den su ròl nobo, Rijna por duna un aporte importante na aksesu na fondonan di Union Europeo i Nashonnan Uní, oumentá prosperidat i amplia e base ekonómiko. Nos ta gradese pa Rijna su gran esfuerso hasi komo gezaghebber di Boneiru, segun van Huffelen.

Posibilidat nobo

Rijna ta gezaghebber for di 2014. Na 2020 a bolbe nombr’é pa un periodo di 6 año komo gezaghebber. Pa

mas ku un año kaba e ta alabes Territorial Authorized Officer (TAO) pa Boneiru na Union Europeo.

Rijna: “Den mi ròl di representante spesial, mi por eksplorá posibilidatnan nobo pa Boneiru, Saba i Sint Eustatius, pa koperashon internashonal. Dor di nos relashon ku Union Europeo, tin hopi oportunitat ku nos por probechá di dje. Esaki ta konta tambe pa algun organisashon ku ta kai bou di Nashonnan Uní ku por nifiká hopi pa nos islanan.

Mi ta kontentu di por bai traha riba relashonnan fruktífero ku vários partido enbolbí.” E nombramentu i Rijna ta drenta na vigor 18 di aprel.

For di e momentu ei, Nolly Oleana ta fungi komo gezaghebber interino, te na momentu ku terminá e proseso di solisitut pa un gezaghebber nobo.




Na Banko di Kuminda

Stichting Dierenlot a hasi donashon di kuminda

KRALENDIJK -- Boneiru. Stichting Voedselbank ta bisa di a keda enkantá i gradesido ku e donashon grandi ku Dierenlot a hasi. “Nos ta hopi

gradesido ku e donashon akí,” asina Voedselbank Bonaire a bisa den un reashon. Ku e preis di kuminda ku ta subiendo rápido na Boneiru, hopi residente tin problema pa kumpra suficiente kuminda pa nan mes, te pa nan por kumpra pa nan animalnan. Ku e krisis di inflashon, trabou di Stichting Voedselbank Bonaire ta birando ainda mas importante di loke e tabata ta kaba.



PARTISIPASHON

Pa motibu di trabou di konstrukshon ta sera e siguiente kayanan parsialmente pa tur tráfico dia **29 di mart 2023 entre 10.00 or i 12.30 or**: Kaya Playa Lechi: for di Bulevar Gobernador Nicolaas Debrot te Kaya Playa Lechi 35.

Ta usa e kayanan pafó di e área ku ta será komo ruta di desviashon. E área ku ta será ta alkansabel na pia.

Nos diskulpa pa e inkumbiniensia i danki pa bo kompreshon.

Pa mas informashon manda un email na civielewerken@bonairegov.com

Gezaghebber,
E.E. Rijna

Sekretario Insular,
mr. C.J. Frans

Automobil Express

ta buska

- **2 elektro-mekániko**
- **1 auto-spuiter**

Pa mas inf. tel. nr **700-8725**

DUSHI TEMPU DI TELEVISION

Ku e seri aki mi ke hiba boso den tempu. Mi ke rekordá huntu ku esnan ku a lanta den añanan sesenta i setenta television di e tempu aya. Television “pretu ku blanku”. Tambe pa laga e generashon despues sera konosí ku loke tabata dibertishon pa mucha, hóben i adultonan den dékadananan sesenta i setenta riba nos isla. TeleCuraçao a drenta operashon dia 31 di yüli 1960.

Mannix

Mannix ta un seri di television merikano di detektive ku a kore di 1967 pa 1976 na CBS. Su kreadónan tabata Richard Levinson i William Link, desaroyá pa produktor ehekutivo Bruce Geller. E protagonista tabata Joe Mannix, un investigadó privá, interpretá pa Mike Connors. Su nòmber ofisial tabata Krekor Ohanian, nasé dia 15 di ougùstùs 1925.

Su papel komo Mannix a podusí un Golden Award p’e na 1970, igualmente kuater nominashon konsekutivo pa un Emmy. Durante e promé temporada Joe Mannix ta traha pa un agensia di detektive di Los Angeles yamá Intertect, ku tabata e título original di e seri. Su superior ta Lew Wickersham, hungá pa Joseph Campanella. Intertect ta usa kòmputer pa solushoná krimen.

Kontroversial

Mannix ta un personahe kontroversial. E ta bai kontra e otro empleadonan di Intertect. E ta un reshèrshi klásiko ku no ta kere den uso di kòmputer pa solushoná krimen. E ta atendé su trabou na manera tradishonal. E ta ignorá su hefe i ta desobedesé su órdennan. Mannix ta bisti ‘sport-coat’ na lugá di flus i tin su mes ofisina. Su hefe, Lew, ta trata pa medio di kámara pa sigui moveshon di tur su trahadónan. Pero Mannix ta blokea e kámara ku un rèki na unda e ta kologá su bachinan. Pa mihorá e sifranan di e seri Bruce Geller ta hasi



algun kambio, hasiendo e seri meskos ku e serinan normal di detektive. Den e promé episodio di e segundo temporada Mannix ta anunsiá ku el a retirá for di Intertect.

Asistente

Desde e segundo temporada e ta traha ku viuda di un ofisial polis, Peggy, interpretá pa Gail Fisher, un di e promé aktrisanan pretu pa hunga un ròl fast den serinan regular na television. Mannix ta mantené un re-



lashon ku Los Angeles Police Department. E ta interkambiá na vários okashon informashon ku e departamentu polisial aki. Su persona di kontakto mas frekuenta ta teniente George Kramer, interpretá pa Larry Linville, ku tabata partner di e esposo defuntu di Peggy. Mike Connors a fayesé dia 26 di yanüari 2017. Su partner den e seri, Gail Fisher, a fayesé dia 2 di desèmber 2000 na edat di 65 aña.



MONCHI & TONCHI

Un hòmber ta puntra su amigu ku e tin hopi tempu sin mira pa su kasá. E amigu a bis’e ku e kasá a muri.

Awèl si, sikiera e sá unda su kasá ta. Hopi no tin un idea.



KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com

aviso: avisobon@gmail.com

Wèpsait: www.extraboneiru.com

Facebook: Extra Boneiru

Direktor
Shirley Martis
785-3824
796-3824

Partner na Aruba
Awe Mainta
Partner na Kòrsou
Extra
Partner na Boneiru
Live99

Redakshon
Papi Antoin
Nathaly
Evertsz-Ipcedencia
Davienuska Janga
Velli Gijsbertha
Edson Pietersz
Ibi Piar (deporte)

Layout
Davienuska Janga
Maya Beaumont

Konsehero:
Bòl Antoin
786-6818
Aviso
avisobon@gmail.com

Sindikalismo na Boneiru 12



Nòchi Willem, konsehero di Union Sindikal Boneriano, USIBO

Un yamada na e klase trahadó pa pensa. Si analisá e kantidat di hende ku a bai vota ta yega na alrededor di 3978 pa Demokrat mas 2902 pa UPB mas 2038 pa MPB mas 984 pa M21 mas 266 pa 1UPP mas 66 pa URB pa un total di 10234 voto. Mi tin sigur ku 90%, ku ta 9210 persona di e kantidat aki ta trahadó, mama di kas, hòbenan, mama soltera i tata soltero. Sindikalismo i sigur USIBO su meta ankrá den su statuton ta bisa ku e ta sali na defensa i interés di e klase trahadó i su famia. Awor para ketu, pensa pa bo mes i puntra bo mes ta kiko ta e interés di abo komo trahadó pa ku bo mes i bo famia.

Ora bo ta organisá den un sindikato ta esaki ta e lucha kontinuo ku sindikato ta hiba ku un partisipashon direkto di abo den dje. Komo miembro di e sindikato bo ta yuda den un reunión general stipulá e kondishonnan ku bo ta deseá pa e direktiva di e sindikato lucha pe ora e ta na mesa ku e dunadó di trabou. Kiko e kondishonnan aki ta?

Na promé lugá mester tin un kas di salario na e empresa, den kua tin deskribí e funshonnan ku tin den e empresa, kiko ta e tareanan mará na e funshon i kiko ta e salario mará na e funshonnan. Awor e forma ku bo salario ta hinká den otro por ta di e siguiente manera. Bo

ta kuminsá ku un salario i según bo ta traha a base di bo prestashon ta oumentá bo salario te ora e yega e máximo ku ta mará na e funshon. Pues bo ta krese den bo trabou a base di bo prestashon. Tambe bo sindikato por negoshá pa tur aña tin un oumento di bo salario banda di e oumento a base di prestashon. Mas aleu e sindikato por negoshá ku pa mantené bo forsa di kompra, ta adaptá bo salario tur aña na e sifra ku buró di statistik ta saka i ta mustra kiko e inflashon ta. Inflashon ta ora ku preis di produkto i servisionan subi i ku e ta pone ku bo por kumpra ménos ku e mesun sèn ku bo tin. E kondishonnan aki nos

ta yama kondishonnan primario i manera boso mes ta mira abo komo trahadó miembro di e sindikato tin influensha riba dje na momento di negoshá. I aki boso mester realisá ku den politika abo komo trahadó ku ta simpatisá un partido òf un persona, ta bo mes òf den un situashon ideal bo sindikato ta para huntu kubo tin ku negoshá bo kondishonnan laboral. Ni partido ni kandidato no por negoshá bo kondishonnan laboral. Antó den sindikato no ta mira koló polítiko sino simplemente ta mira abo komo trahadó i nada mas. Pa sindikato un hende ku ta presta labor, ku ta duna labor tin derecho riba un pago hustu pa e 40 ora di trabou ku

e ta duna pa asina e por kria su mes i esnan ku ta dependé di dje. Ora bo ta vota pa un partido politiko bo no ta vota pa mehorá bo kondishonnan di trabou pasobra esei e partido politiko no por ni ta hasi pa abo. Pues awe mi a kompartí ku e motibu mas importante pa bo djòin un sindikato ta ku abo huntu ku bo kompañeronan di trabou tin tur influensha pa negoshá bo kondishonnan di trabou. I awe mi a papia di e kondishonnan primario, ku ta e kondishonnan mas prinsipal, esta bo salario. Otro siman lo mi amplia riba e kondishonnan sekundario ku ta e otro kondishonnan banda di bo salario.



Programanan di Bonaire.tv

TELBO kanal 70

Flamingo TV kanal 23

Djamins 28 mart 2023

12.00 Herensia:	Juan Martina
13.00 Aki Korsou:	Hugh Lopes
14.00 Herensia:	Franklin (Frank) Hanze
15.00 BAPA:	Junior Tecla
16.00 Aktualidat:	Andres (Nel) Nicolaas i Gladis Elena Cossio
17.00 Aki Bonaire:	Classical Music Board na Courtyard Marriott
18.00 Herensia:	Elvis Modesto (Piskechi) Martinus
19.00 BAPA:	Lucerio Winklaar
20.00 Herensia Aruba:	Persey Jeandor
21.00 Aki Bonaire:	Maskarada 2020
22.00 Herensia Korsou:	Rosa Anastasia i Swinda Marcela Albertus-Conrades
23.30 Puerto Latino:	Luis Zárraga

Tur mèrdia 12'or ta kuminsá un programashon nobo di 4 ora. E programashon aki ta ripití pa 24:00.

E DESEO DI SEÑOR

“O, ku nan tabatin tal kurason den nan, ku nan lo tabatin temor pa Mi, i semper warda tur Mi mandamentunan, pa bai bon ku nan i ku nan yunan pa semper!” Deuteronomio 5:29(BS)

Bo por skucha i komprendé e seriedat di e bos di Dios den loke E ta bisa aki? Dios Su deseo ta, pa nos por warda Su mandamentunan. Kue e palabra warda aki, E ke men, pa nos obedes'É, hasi kaso na djE i kumpli. Dikon? Pasobra e ta kompañia ku un promesa: lo bai bon ku esun ku ta obedesé i e promesa ta bai mas aleu ainda, lo bai bon pa su yunan tambe pa semper.

Dios ke nos bon, i si nos skucha na djE i obedes'É Su bos ta bai nos bon.

Kisas lo bo puntra, kon mi por obedesé e versíkulo akí. Tuma nota ku e versíkulo ta bisa ku e proseso ta kuminsá den nos kurason. Den nos kurason nos mester ta teme Dios promé i di mes obedensia na Dios Su Palabra ta bai mas fásil.

Lesa Dios Su Palabra tur dia di nobo, pasa tempu ketu den Señor Su presensia. Skucha E papia ku bo i habri bo kurason pa e kosnan di Dios. Ta esaki ta yuda bo, pa asina bo por obedesé Su mandamentunan. Biba den un relashon íntimo ku Hesus, i hasi fielmente loke Su Palabra ta bisa.

Den kualke situashon ku presentá, siguiÉ, E ta fiel, E sa dikun E ta bisa bo pa no bai einan, no hasi esaki, ma si hasi esaya. Dios bendishoná bo i ku Spiritu Santu obra den bo bida pa bo por komprendé loke Dios ta deseá di bo. Ku lo bo OBEDESÉ.

Obedensia na Dios tin bunita promesa pa bo i bo yunan.
Diannenara Mercera

Produkshon PGM

Drechando kas den dekadensia

Dos hóben ta inisiá akshon di ayudo

KRALENDIJK -- E hóbenan Davidlee Winklaar i Raheem Janga, a tuma inisiativa pa kumin-

sá restorá ruina kaminda hende ta biba i transformá esaki den un bibienda. Den nan trabou komo

agente polisial, nan a tuma nota di diferente kas den situashon deplorabel ku hende ta biba aden. E hen-

denan aki no tin manera pa drecha esaki riba nan propio forsa.

Esaki a motivá nan pa start e movimentu 'Pueblo ta salba su pueblo'. Sí tur hende duna un man chikí, poko poko nos mes por yuda nos próhimo.

E promé kas ku a start

ta keda na Kaya Grandi. Despues di un wikènt di trabou, ya por tuma nota di un diferencia.

Diferente persona a pasa yuda, otro a hasi donashon i diferente instansia i negoshi a hasi donashon pa sostené e proyekto akí.



vacature

Commissaris OBNA

Namens Openbaar Lichaam Bonaire

De Organisatie

De Ontwikkelingsbank van de Nederlandse Antillen (OBNA) is in het jaar 1981 opgericht en is gespecialiseerd in middellange- en lange termijn leningen die de economische ontwikkeling op de eilanden stimuleren. Het gaat dan om Curaçao, Sint Maarten, Bonaire, Sint Eustatius en Saba. Hoewel de organisatie gevestigd is op Curaçao, is het Openbaar Lichaam Bonaire mede-aandeelhouder in de Vennootschap. Namens het Bureau Deelnemingen van het Openbaar Lichaam zijn wij op zoek naar kandidaten voor de rol van Commissaris bij OBNA, afgevaardigd door het Openbaar Lichaam.

De rol

De RvC van OBNA heeft als kerntaak het houden van toezicht op het beleid van de directie en op de algemene gang van zaken binnen de vennootschap. Als commissaris staat u de directie, vanuit uw expertise, daarnaast bij met raad en daad. Bij de uitvoering van uw taak laat u zich steeds leiden door het belang van de vennootschap en haar onderneming. Naast de RvC is er ook een Commissie van Advies, die specifieke taken heeft op het gebied van rentebeleid en investeringsbeleid. Als Commissaris kunt u tevens worden benoemd in de Commissie van Advies. Vanuit uw rol onderhoudt u contacten met diverse partijen die van belang zijn voor de OBNA.

Uw Profiel

Om in aanmerking te komen voor de functie dient u tenminste een HBO-opleiding te hebben op het terrein van Governance, Finance, duurzame economische ontwikkeling of het bankwezen. Bij voorkeur hebt u reeds ervaring met het houden van toezicht binnen organisaties. U herkent zich in competenties als authenticiteit, bestuurlijk inzicht, heliopterview, integriteit, onafhankelijke meningsvorming, maatschappelijk bewustzijn en interpersoonlijke sensitiviteit. U bent daarnaast een teamplayer. Nadrukkelijk wordt gewezen op het feit dat het Openbaar Lichaam diversiteit nastreeft in haar toezichhouders, als het gaat om leeftijd en sekse. U bent op Bonaire woonachtig en duidelijk bij het eiland betrokken.

Uw reactie

Spreekt deze rol u aan? Stuur dan een brief met CV vóór 10 april 2023 aan: **Linkels & Partners** T.a.v. drs. Harald Linkels via mail: harald@linkels.com



De volledige profielschets kunt u ook opvragen via bovenstaand e-mail adres.

Linkels & Partners
PSYCHOLOGISTS | TRAINERS | CONSULTANTS



Karchi ta na benta

Tur kos ta kla pa Kanto Krioyo

KRALENDIJK -- Djárason Kanto Krioyo ta kuminsá. Ya tur kos ta praktikamente kla pa e festival, ku ta partí den tres anochi, dos anochi preliminar i e anochi final ku ta djasabra.

BONERIANO a kombersá ku Maikel Janga, kende a duna di konosé ku tur kos ta kanando zetá i ku karchinan tambe entretantu ta na benta.

“Te ku djárason atardi por kumpra pakete pa tur e dianan na rason di 25 dòler. Despues ta bende kada dia separá,” Janga a bisa.

Komishon ta invitá pueblo pa bin apoyá tur e

partisipantenan ku a bin ta traha duru pa duna un bon presentashon.

Karchinan ta optenibel na pòm di gasolin Rincon i na Social Cafe.

Tambe por tuma kontakto ku un di e miembronan di Komishon Kanto Krioyo pa karchi.

Glen na 785-6919, Jenny 780-9766, Mika 796-0029 i Dorothy na 796-9046.

E festival krioyo hubenil ta tuma lugá djadumingu. Tur e festivalnan ta tuma lugá den Stadion Antonio Trinidad.

Selebrashon 40 aña Telbo



Selebrashon 40 aña Telbo



MiVaBo i BonDoet a hasi posibel

Grandinan a bai landa

KRALENDIJK -- Dia 10 di mart un grupo di adulto mayó a bai laman na Sorobon despues di mas di 20 aña. Un bús spesial pa ròstul, a baha tres ròstul na laman. Despues un pikòp a yega i tabatin dos mas.

Boluntarionan di BonDoet a yuda baha e grandinan i tur loke tabatin mester pa e dia na laman. Nan tabatin entre otro vèst di salba bida, stul i algun kaha.

Artie de Vries di MiVaBo a risibí e grupo. MiVaBO ta e fundashon ku ta sali na vanguardia di esnan ku un òf mas desabilidad. De Vries a splika intenshon di e dia i a introdusí e persona ku a inisiá trámitenan pa ròstul spesial pa laman yega Boneiru. Ta trata akí di Ingrid Havermans.

E dia na playa pa hende grandi tabata un proyekto organisá pa MiVaBo, den koperashon ku BonDoet. MiVaBo kier a ofresé e grandinan e sintimentu spesial dor trese rekuerdo di e tempu ku nan por a bai Lac òf Sorobon.

Manera un rei

BonDoet a proveé 10

boluntario ku a registrá pa yuda ku e aktividat. Guiá pa Havermans, nan tabata pone e grandinan den ròstul i despues bai laman ku nan. E grandinan por a landa, òf simplemente sinta i disfrutá di laman. Tabatin tres boluntario pa ròstul.

E promé persona ku a sinta den ròstul, tabata Nicolaas Wanga, èks kapitan di boto i èks landadó di 90 aña. E siguiente tabata su esposa, Otilia. Niun di nan dos drenta laman pa mas ku 20 aña.

Nicolaas tabata manera un rei, ku su brasa krusá i un sonrisa grandi riba su kara. Ora e boluntarionan a ripará ku el a kustumbrá na e situashon, nan a puntra sí e ke sali for di ròstul i usa 'pool noodles' i keda drif. Mesora el a bai di akuerdo, pero ku boluntarionan ku bista riba dje.

Entusiasma

Esnan na kantu tabata animá i gosa esnan den awa. Un señora den promé instante no tabata masha entusiasma ku e idea di drenta awa. Mirando e alegria i entusiasmo serka e otronan, el a disidí di djòin. Ku su sombré riba

kabes i brel na wowo, e boluntarionan a guia e señora pa bai laman.

“Mi no ta sali for di awa mas pa awe. Próximo biá ku Mivabo tin algu igual mi ta den,” e señora a bisa.

Algun di esnan ku no a drenta awa, a sigurá ku nan lo partisipá den e siguiente aktividat na laman. Despues di pasa un ratu den awa, e grandinan por a disfrutá di algu di kome i bebe

E grandinan a bira un atrakshon pa esnan ku e momentu ei tambe tabata na laman. Tabatin hopi pregunta i esun ku mas e boluntarionan e kontesta ta dikona a organisá e aktividat.

Ròstul pa laman

Ingrid Havermans a introdusí ròstul spesial pa laman. Di e forma akí laman ta bira aksesibel pa grandinan. Ta finalizando un proyekto pa ofresé vakashon spesialisá pa personanan ku nesidadnan spesial. E ta hiba di nòmber KAS di KURASON. E wèpsait ta www.kasdikurason.com òf tambe por manda mail na info@kasdikurason.com

Nan ta alkansabel na 599-777-4488.

Mirando interes i aseptashon di e aktividat, MiVaBo tin plania mas di e enkuentronan akí durante aña. Meta prinsipal di e fundashon ta aksesibilidad pa un i tur. Ku e proyekto akí sigur e fundashon ta na kaminda pa alkansá e meta. MiVaBo no tin entrada, p'esei e proyekto BonDoet tabata un iniciativa perfekto. Di e forma akí MiVaBo por a hür e stulnan i kumpra refresko pa e partisipantenan.

E fundashon ta aploudí tur e grandinan di Hòfi Kultural ku tabatin asina kurashi pa partisipá na e aktividat. Tambe ta gradisí tur boluntario i instansianan ku a koperá.

MiVaBo

MiVaBo ta un fundashon, no tin miembro, pero ta purba pa tur siudadano di Boneiru ku desabilidad risibí loke nan tin derecho riba dje. Esaki ta difisil, debí ku lei no ta stipulá nada ainda. E fundashon ta yuda kaminda ta posibel i ta duna konseho

i sugerensia. Ta papia ku instansia i polítikonan.

Sa sosodé tambe ku turistanan ku ke bin bishitá Boneiru ta tuma kontakto ku MiVaBo. E turista ke sa kiko ta tur e posibilidatnan pa un hende desabilidad riba nos isla. Un otro desaroyo positivo, ta ku mas i mas ta pidi MiVaBo konseho tokante aksesibilidad ora ta diseñá edifisionan nobo.

MiVaBo no por enfatisá sufisientemente e importansia di dediká hopi atenshon na kuido di hende grandi. Mas ku 60% di poblashon di Boneiru tin 60 aña òf mas. No ta tur hende di edat ta biba den kas di hende grandi. Tin ta den nan mes kas i tur mester risibí e atenshon ku nan mester unda ku nan ta biba. Esaki lo sigurá ku nan por biba mas tantu tempu den nan mes kas.

E mihó manera ta pa establese un konseho di kliente i laga e grandi disidí huntu kiko ta mihó p'e. MiVaBo no mester ta esun ku ta ofresé e tipo di rekreashon akí, sino IN-DEBON.



HULANDA

Despues di aksidente fatal na Alemanian

Spantu, verdrit i pregunta

HULANDA – E aksidente na Alemanian djadumingu kaminda kuater hulandes a pèrdè nan bida, a kondusí na hopi verdrit. “Nos a spanta enorme,” Jacco Brand, a bisa. E ta

presidente di un fundashon kaminda dos di e víktimanan tabata hasiendo trabou boluntario ku nan outo.

Tres hòmbèr di 39, 42 i 56 aña i un muhé di 37 aña, djadumingu a pèrdè nan

bida. E shofùr di 39 aña di Nieuwegein i e hòmbèr di 42 aña di Voorhout, regularmente ta pone nan outo disponibel pa trep ku mucha malu, Brand ta konta.

“Ámbos tabata amante di outo i tabata den flor di nan bida,” e presidente di Stichting Dag met een Lach, ta bisa. E organisashon, ku no tabata enbolbí na e aksidente fatal, ta papia di un dia pretu.

Polis aleman ainda no tin informashon nobo tokante e investigashon. Sí un bosero por bisa ku e persona levemente heridá tambe

ta un hulandes. Ta trata di un okupante di e outo ku a aksidentá. E speransa ta ku e persona akí por duna mas klaridat tokante e aksidente.

Na e aksidente ku mas vehíkulo enbolbí riba A3 djis pegá ku e frontera di Emmerich, tabatin tres Porsche enbolbí. E shofùrnan tabata partisipá na un paseo di 9 Miles, un organisashon di fanátiko di outo na Purmerend. Na e paseo, segun Brand, a partisipá mas boluntario di Dag met een Lach.

Probablemente e pro-

mé outo lo a slep komo konsekuensia di kaminda muhá. E shofùr di 39 aña di Nieuwegein lo mester a bai pa yuda e duo. El a stashoná su outo banda di kaminda i saka e duo for di e outo. Momentu ku tur tres tabata kantu di kaminda, un shofùr di 56 aña a kore yega.

Dor di orígen ainda deskonosí e shofùr akí tambe a pèrdè kontrol ku komo konsekuensia ku el a bin dal e trio ku tabata pará kantu di kaminda. E muhé di 39 aña i e hòmbèr a muri al instante.



Èkstra plaka pa lesa, skirbi i hasi matemátika na skol

DEN HAAG – Gabinete ta pone èkstra plaka disponibel pa muchanan lesa, skirbi i hasi matemátika mihó. Minister Dennis Wiersma di enseñansa primario i sekundario, ta oumentá e presupuesto ku 200 mion euro pa e dos añanan eskolar binidero. Anteriormente Gabinete ya a pone 400 mion pa e periodo ei pa mehorashon di e abilidadnan básiko.

Ku e plaka akí, segun e ministerio, por yuda mas òf ménos 2200 skol den enseñansa básiko. Ta trata di mas ku 650 mil alumno. Na promé instante e plaka ta bai pa skolnan ku mas tinesesidat.

Skolnan ku ta partisipá ta risibí anualmente 500 euro pa alumno. Mester dediká e plaka akí na solushonnan efektivu, manera èkstra lès den gruponan chikitu,

stimulá lesamentu, re-edukashon di dosente, òf métonan di lès nobo. Tambe skolnan por haña un tim básiko pa yuda alumnonan ku abilidadnan básiko.

Segun Wiersma, e aserkamentu ta altamente nesario. Ta di gran importante pa haña e kaminda atrobe na altura sí ta trata di kosnan importante ku mester siña na skol i lihé tambe.

Ya pa algun aña Ins-

pekshon di Enseñansa ta advertí ku e abilidadnan básiko no ta bon reglá. Un omento di kantidat di alumno ta

bandoná enseñansa ku tiki konosementu di idioma òf matemátika, e inspekshon a konstatá aña pasá.



Despues di aksidente kaminda ruman muhé a muri

Mucha hòmbèr bèk na kas

UTRECHT – Un mucha hòmbèr di sinku aña ku un bùs a dal djabièrnè riba Vleutenseweg na Utrecht ta bèk na kas, polis ta informá. Su ruman muhé di shete aña a pèrdè su bida dor di e aksidente. E muchanan huntu ku nan mama, tabata na kaminda pa skol banda di 8’or di mainta momentu

ku nan a krusa den e bario Lombok i a keda alkansá pa un bùs di estado. Polis ta informá ku tur pasahero di e bùs a haña yudansa di ofisina di ayudo na víktima. Otro personanan ku tambe a mira e aksidente, por haña ayudo. Ainda no a finalisá e investigashon di e kousa di e aksidente.





Tur mèrdia pa 12or klòk ta bati na misa San Luis Bertran di Rincon. Temporalmente

Parokia di Rincon a keda mantené tradishon di 'Angel di Señor'

Pa: Bòi Antoin

sinembargo a stòp esaki, sperando riba drechamentu di e torno di misa, ku ta den kondishon deplorabel. Probablemente ta e úniko parokia den obispado di Willemstad na unda e tradishon aki ta eksistí ainda. En todo kaso, pader Ivan Dario Gomez a trese e tradishon aki bèk. Durante 1 minüt largu Jeffrey Anthony, konosí komo Djèguèdjèguè, ta



lei klòk tur mèrdia 12or. E batimentu di klòk pa 12or di mèrdia ta konosí komo 'Angel di Señor' òf simplemente 'Angelus'.

Orígen

Batimentu di klòk pa anunsia 'Angel di Señor' tin su orígen den Evangelio segun Lukas, kapítulo 1: "Den e di seis luna ku Elisabet tabata na estado, Dios a manda angel Gabriel bai Nazaret, un siudat na Galilea, pa bishitá un sierto birgen ku tabata komprometé pa kasa ku Hosé, un desendiente di David. E mucha muhé tabata yama Maria. E angel a drenta serka Maria i a bis'é: 'Mi ta saludá bo. Señor a faboresé bo ku su grasía. E ta ku bo!'"

Iglesia Katóliko a introdusí e tradishon pa kada mèrdia 12or bati òf lei klòk pa rekordá katólikonan ku nan mester resa e orashon 'Angelus' komo forma di hasi memoria di Anunsiashon, pues ku angel Gabriel a anunsia nacementu di Hesus.

Papa Cornes

Den pasado na tur parokia di Boneiru tabata bati klòk di 'Angel di Señor'. Ya for di promé mes ku a kuminsá papia di parokia, esta for di prinsipio di siglo 19, tempu ku Cornelis Marten, Papa Cornes, tabata hasi trabou pastoral riba e isla aki, el a kuminsá ku batimentu di klòk pa 12or di mèrdia.

E biógrafo di Papa Cornes, pastor Hein Nooyen, a skirbi: "Nos no sa di ki manera Papa Cornes por a bini kla, ma el a haña un klòk chikitu pa su misa sí. El a kolog'é bou di un palu di watapana banda di misa. Tur dia e ta bati e klòk pa resa Angel di Señor. P'esei hende ta yama su klòk 'Klòk di Ave Maria.'"

Motibu

Pastor Ivan di parokia di San Luis Bertran a mira ne-

sesidat pa bini ku e tradishon pa bati klòk di Angel di Señor. E ta haña esaki un bon tradishon, esta pa rekordá anunsio di nacementu di Hesus. Sigur den e tempu aktual ku por nota dekadensia den mantenshon di norma i balornan ku a lanta konosé na Boneiru.

Pa bati e klòk aki pastor Ivan a kontratá Djèguèdjèguè, konosido habitante di Rincon, ku nèt 5 minüt promé ku 12'or ta yega na porta di misa di Rincon, subi riba e piso na unda kor ta kanta, pa bati e klòk.

Djèguèdjèguè a konta: "Na momentu ku pastor a pidi pa bati klòk 12or di mèrdia mi a asepta mesora. Mi a siña bati e klòk aki serka Sira Molina. No ta asina sina ta bati klòk. Mi ta bati klòk manera Sira a siña mi."

Reakshon

Pader Ivan a bisa el a haña bon reakshon riba e re-introdukshon di batimentu di klòk Angel di Señor. E ta kontentu tambe ku e forma kon Djèguèdjèguè ta kumpli ku su tarea. Si Djèguèdjèguè keda sin yega un dia, pastor mes ta bati e klòk di 12or.

Djèguèdjèguè: "Mi a yega di faya, pero masha tiki biaha. Mi ta trata pa kumpli tur dia religiosamente."

Durante santu sakrifisio di misa pastor Ivan a gradisí públikamentu Djèguèdjèguè pa su servisio.

Normalmente katólikonan sa hasi señal di krus, 'Nòmber di Tata', ora ku nan tende e klòk di 12or bati. Pero tin un orashon spesial pa resa durante e 1 minüt ku e klòk aki ta bati. Huntu ku e artíkulo aki por haña e orashon na spañó, pero di mes den archivo di e parokianan na



sr. Bòi Antoin

Boneiru lo mester tin un verashon na Papiamentu.

Otro parokia

Aparte di parokia San Luis Beltran, tin dos otro parokia na Boneiru, esta parokia San Bernardo (Playa) i Coromoto (Antriol), na unda ku den pasado sa bati klòk di 'Angelus', den boka di pueblo 'Angel di Señor'.

Te asina leu ku por averiguá, aworakí ta na solamente parokia di San Luis Bertran ta bati klòk 'Angel di Señor' riba e islanan ku ta kai bou di obispado.

Pader vikario eks Santiago Olegon tabatin idea di proponé pa nan kuater pastor katóliko na Boneiru diskutí esaki batimentu di klòk Angel di Señor tambe den e dos otro parokianan. "Pakiko no? E ta un bunita tradishon, rekordá nos katólikonan pa resa, den e kaso aki 12or di mèrdia. Nos lo bai papi'é, tambe huntu ku monseñor Secco", pastor Santiago a splika.

Naturalmente tin e dilema pa haña hende pa tur mèrdia bati e klòk. Riba esaki pader vikario Santiago Olegon a bisa ku un posibilidat ta pa hasi uso di un sistema komputarisá, konektá na un oloshi digital, pa outomátikamente laga e klòk den torno di misa bati.

8 dato di bida di San Pablo VI

San Pablo VI, Giovanni Battista Montini, ta konosí pa ta e Pontífise ku a finalisá e Konsilio Vatíkano II ku su pre-desesor Huan XXIII a kuminsá.

Sinembargo, hopi echo importante di su pontifikado ta poko konosí. Tabata tempu ku medionan di komunikashon no tabatin e alkanse ku nan tin awendia, ku internèt i retnan sosial.

Aki nos ta presentábo ocho kos ku probablemente bo no tabata konosé di San Pablo VI:

1. 27 di Novèmber 1970, na e Aeropuerto Internashonal di Manila (Filipinas), Pablo VI a risibí dos puña di parti di e pintor boliviano Benjamín Mendoza i Amor Flores, ku tabata sufri di problema mental i el a disfrasá na saserdote i el a purba na asesiná e Pontífise ku un puñá.

2. E tabata e promé Sumo Pontífise ku a usa un avion pa su biahenan.

3. E tabata e promé Sumo Pontífise ku a bishitá e sinku kontinentenan, i, promé ku San Huan Pablo II, el a risibí e apodo di "Papa peregrino". El a realisá un bishitá pastoral na e kontinente afrikano; i tambe el a bishitá Colombia i Estádus Unídos, na Amérika; Portugal, na Europa; Australia, na Oseania; Filipinas i India, na Asia.

4. E tabata ademas e promé Papa ku a bishitá Tera Santu for di tempu di San Pedro. Na Herusalèm, na 1964, el a topa ku e Patriarka ortodokso Atenágoras I, ku kende el a selebrá e anulashon di e mutuo ekskomunion imponé despues di e Gran Kiebro entre oriente i oksidente, na 1054. Papa Francisco a bishitá tera Santu na 2014 pa sele-



brá e 50 aña di e akontesimentu akí.

5. E tabata e último Pontífise ku tabatin un seremonia di koronashon i e promé pa kita uso di e tiara, durante e seshonnan di e Konsilio Vatíkano II. Eventualmente el a duna su tiara, un regalo di su antiguo Arkidiósesis di Milán, na e Basilika di Santuario Nashonal di Immaculata Konsepsion na Washington (Estádus Unídos), komo señal di su apresio pa e katólikonan estadounidense.

6. El a ehersé e ministerio saserdotal durante 58 aña. El a ordená riba 29 di Mei 1920 i tabata papa for di 21 di Yüni 1963 te su fayesementu 6 di Ougüstùs 1963.

7. Nino Lo Bello, veterano "vatikanista" estadounidense, a sigurá ku Pablo VI, un apashoná di lektura, tabatin den su ekipe, durante su biahenan, asta 75 buki pa por skohe kua lesa.

8. San Pablo VI a kreá kardinal Karol Wojtyla, na 1967, i Joseph Ratzinger, na 1977, kendenan despues a bira su sucesor San Juan Pablo II i Benedicto XVI, respèktivamente. A beatifik'é 19 di Òktober 2014 i a kanonis'é 14 di Òktober 2018, pa papa Francisco.

* Fuente: Aciprensa

ANGELUS

V. El Ángel del Señor anunció a María.
R. Y concibió por obra del Espíritu Santo.
Se reza un Ave María

V. He aquí la esclava del Señor.
R. Hágase en mí según tu Palabra.
Se reza un Ave María

V. Y el Verbo se hizo carne.
R. Y habitó entre nosotros.
Se reza un Ave María

V. Ruega por nosotros Santa Madre de Dios.
R. Para que seamos dignos de alcanzar las promesas de Nuestro Señor Jesucristo.
Amén.

V. Gloria al Padre y al Hijo y al Espíritu Santo
R. Como era en el principio, ahora y siempre por los siglos de los siglos. Amén.
(tres veces)

Oremos: Te rogamos, Señor, que derrames tu gracia en nuestras almas, para que, los que por el anuncio del Ángel hemos conocido la encarnación de tu Hijo Jesucristo, por su pasión y su cruz, seamos llevados a la gloria de la resurrección. Por el mismo Cristo Nuestro Señor. Amén



KÒRSOU

Ku partisipashon di Boneiru i Aruba

Apertura weganan interinsular

WILLEMSTAD— Apertura di Weganan Interinsular Eskolar 2023 a tuma lugá na Sentro Deportivo Kòrsou (SDK) djasabra 25 di mart. E weganan ta konta ku partisipashon di Kòrsou, Aruba i Boneiru. Weganan interinsular eskolar ta organisá pa Fundashon Desaroyo Deportivo Kòrsou (FFDK) huntu ku Sektor di Kultura i Deporte den koperashon ku Instituto

Biba Saludabel y Activo (IbiSA) i ‘Instituto di Deporte Boneriano (Indebon). E kompetensianan a tuma lugá e fin di siman riba dianan 24 i 25 di mart den SDK i ta den e ramonan di Atletismo i Trèfbal.

Apertura a konta ku presensia di Minister enkargá ku deporte sr. Sithree van Heydoorn, Parlamentario sr. Steven Croes, Parlamentario sr. Elvin Gerard,

dignatarionan di Aruba, Boneiru i tur e atletanan di paisnan. Tambe por a tuma nota di alumnonan di

e skolnan di fundeshi: Sint Antonius College, Helfrich Krijtschool, Emy Bertold, Fatima College i Sint Joris

college ku a bai pa animá tur e atletanan ku a bini pa partisipá na e weganan.



Min. Cooper a otorgá pèrmit

Promé ‘Community Center’ na kaminda

WILLEMSTAD — Djaweps 23 di mart Minister Cooper huntu ku Servisio pa Planifikashon Urbano (ROP) a hasi entrega di pèrmit di konstrukshon pa un ‘community center’. Pastor Eugene Huybregts a risibí e pèrmit pa e konstrukshon. E sentro ta bai ubiká den bario di Mon Repos. E sentro lo konta ku un teatro pa aktividatnan

sosial i spiritual, salanan ku ta disponibel pa hür. Lo tin tambe un skol pa muchanan di kual mayoria ta muchanan di ménos rekursu. E parti di skol ta bira posibel danki na spònsernan ku ta kontribuí pa kubri gastunan di e muchanan. Un sentro di ‘bowling’, restorant, espasio pa duna lès, i espasio pa muchanan rekrea tambe ta forma parti di e proyekto.

Tur esaki lo ta un invershon total di 4 mion

florin den e promé fase pa despues sigui ku fase dos,

ku tambe lo ta un promedio di 4 mion.

Detenshon pa maltrato

WILLEMSTAD— Polis mester a bai Kaya Enkanto pa un kaso di maltrato den oranan di mardugá di djasabra. Un hòmer lo mester a maltratá su pareha. E dama víktima a deklará na polis ku despues di un diskushon un ratu promé su pareha lo a maltrat’é i korte na vários parti di su

kurpa ku un kuchú. Na e sitio a detené e hòmer sospechoso L.A.B., nasé na Kòrsou di 35 aña di edat, pa e kaso di maltrato ariba mencioná. A presentá e sospechoso dilanti un fiskal ouksiliar ku despues di interogashon a ordená su enkarselamentu pendiente di mas investigashon.



ARUBA

Hues a splica:

No por condena acusado di abuso pa falta di prueba

ORANJESTAD -- Diabierna mainta Corte a declara Yovany Alberto Machado Guillen liber di e acusacionnan cu el a abusa of comete actonan immoral cu e yiu menor di su pareha. Guillen, kende tabata encarcela di aña pasa ta liber awo. A pesar di e decision di Corte aki cu hopi hende ta cuestiona, Hues den e sentencia, despues di a declara e homber liber, a bisa cu esaki no ta nifica cu Corte no ta kere e menor.

Probablemente e comentario aki a bini despues di sentencianan similar den pasado cu a haya hopi critica bou di comunidad. E caso specifico aki a wor-

do trata na inicio di luna di maart unda el a wordo representa pa abogado mr. Mohammed, mientras cu e partido perhudica (mama di e menor) a presenta cu abogado mr. Vito Carlo y a haci demanda pa daño y perhuicio.

Fiscal a pidi e dia ey un castigo di 66 luna, kitando e tempo cu a pasa den detencion preventivo. Tambe a pidi pa bay di acuerdo cu e demanda di e partido perhudica.

E acusacion tabata cu rond di 18 di december 2020 te cu 18 di october 2021, a comete actonan di immoralidad cu un menor di 16 aña. A papia di pe-

netracion y otro actonan di caricianan sexual, hincando su parti intimo den boca di e menor.

E di dos acusacion, si e promete no keda proba, ta cu rond di aña 2015 te cu 18 di october, 2021, a comete actonan di immoralidad. Den e caso aki e fecha/ periodo ta varia. Corte a yega na e conclusion pa declara e acusado aki liber pasobra no tin suficiente prueba. Pa esaki a tene lo siguiente na consideracion.

A splica cu articulo 385, tercer inciso di Codice Penal ta bisa cu no por condena un acusado basa riba solamente declaracion di un testigo. A pone esaki den

ley pa garantis legalidad di un prueba, den e sentido cu e articulo ta prohibi Hues pa declara algo proba den caso e hechonan y circunstancianan presenta door di un testigo no tin apoyo den un otro tipo di prueba.

Corte ta constata cu e descripcion di e hechonan, manera ta para den e citacion, ta bini exclusivamente for di declaracionnan di e menor menciona eyden. Cu excepcion di declaracion di mama di e menor, tur declaracion cu testigonan a duna ta basa riba loke e menor a conta nan. Y no por mara esakinan na cierto incidentenan concreto.

E decision di Corte aki no ta nifica cu ta duda den declaracion di e menor di loke a pasa cu ne, of cu no por kere e menor. Pero ley ta prescribi cu un persona no por wordo condena un acusado si e prueba ta bini di solamente un persona. Esaki ta asina den e caso aki. Esaki ta nifica cu Corte no a yega of no a atende e pregunta mes di kende su version ta mas creibel, si ta esun di e menor of di e sospechoso. Riba esaki Corte no a expresa su mes y no a profundisa su mes riba dje. Pues den e caso aki no ta bisa cu e homber ta inocente, pero no tin prueba pa conden'e.

Un grupo di hoben lo a agredi y hinca un empleado na Moomba Beach

ORANJESTAD -- Diasabra algo prome cu 9'or

y mey di anochi, na Moomba Beach lo a surgi un pro-



blema caminda dos hoben di un grupo di 5 lo a agredi un empleado di e establecimiento. Pa un of otro motibo dos di e hobennan lo a pasa man pa un botter y a surgi un problema cu a bay for di man, den cual lo a agredi y a hinca un empleado na su brasa. Mesora a logra wanta un di e hobennan aki, kende tabata un damita basta hoben, mesora lo a avisa polis

y ambulance tambe.

Varios unidad di polis a presenta na e sitio, e damita hoben cu nan tabata tin wanta na Moomba Beach, mesora a wordo deteni. Mesora polis a cuminsa cu un buskeda pa e resto di e hobennan aki. Por a mira polis buscando den area di Marriott, di Saliña Cerca y riba beach caminda polis lo a bin topa cu un otro sospechoso mas, e tambe a

wordo deteni. E agentenan na e sitio a pidi pa transportwagen di polis pa hiba e dos sospechosonan pa warda di Strandpolitie. Segun nos a compronde durante buskeda nan lo a detene un otro mas den area di Holiday Inn. Ambulance tambe a presenta pa atende cu e victima, aparentemente ta trata di un manager di e establecimiento cu a wordo hinca na su brasa.

Motociclista seriamente herida despues di a cay cu su brommer

ORANJESTAD -- Diasabdomingo algo despues di

5'or di mainta, riba e caminda dilanti di ex Veld di



Nacional un motociclista pa un of otro motibo a cay cu su brommer y a keda seriamente herida.

Mesora a pidi pa presencia di polis y ambulance mirando cu e homber a haya basta sla na su curpa y aparentemente lo tabata sangra te hasta pa orea.

Na yegada di ambulance e paramediconan a prepara e motociclista herida y cu hopi urgencia a transport'e pa hospital. Polis na e sitio a tuma datos y haci investigacion di e accidente.

Pakete sospechoso haya riba beach

ORANJESTAD -- Diasabra den oranan laat di atardi, algun personal tabata canando riba e beach na Grapefield y aki pa nan sorpresa nan a bin topa cu un of mas pakete sospechoso cu a spoel aan riba e beach. Nan no a confia esaki y a avisa polis.

Mesora algun patrulla di polis a bay direccion di Grapefield pa

bay check si por ta trata di paketenan di droga. Unidad di K9 di polis tambe a bay na e sitio y a cuminsa cu un buskeda extenso riba e beach pa mira si por topa cu mas di e paketenan aki.

Autoridad a confisca e pakete haya riba beach y a wordo entrega den man di e departamento di polis concerni pa haci mas investigacion.

ARUBA

E momento mas iconico for di e mercado di Reino Uni:

Vuelo di British Airways pa Aruba

ORANJESTAD -- E yegada di e vuelo inaugural di British Airways ta representa un era nobo pa Aruba su turismo, ya cu nos lo ta conectando directamente cu un di nos mercadonan di mas importante na Europa. Aruba ta presente den e mercado di Reino Uni desde 1997, y ta consistente-

mente e di dos mercado mas grandi pa Aruba den Europa.

“Nos a caba di regresa for di London, unda a reuni cu un delegacion amplio di ehecutivonan di British Airways cu ken nos a bin ta traha di cerca. Ambos partido ta contento di por a yega e punto aki y ta mira

cu tin demanda pa Aruba y cu esaki lo simplemente sigui crece, principalmente considerando local lo sigui despues di e dia di awe, unda lo amplia Aruba su promocion grandemente bou di clientenan di British Airways y den e mercado Britanico. Ta nota caba con e interes di e biahero afllu-

ente ta resalta. Esey ta pa corda nos cu Aruba ta un destinacion posiciona debidamente.” Asina Ronella Croes, CEO di Aruba Tourism Authority a duna di conoce. 13% Di bishitanenan di Europa a bin for di Reino Uni na 2022, y ta spera cu na fin di 2023 esaki por yega 15%. Ta spera cu den e añanan nos dilanti, a traves di e conexion nobo cu British Airways lo por logra kibra e record di 21% di bishitante Europeo for di Reino Uni cu a wordo estableci na 2017.

Den transcurso di añanan Aruba a lansa diferente campaña y tawata tin diferente momento unico cu a sa di atrae atencion di tanto tour operador como consumidor. Algun di e momentonan mas memorabel tawata por ehempel promocion di Aruba riba London su taxi pretonan, den e underground metro system di London como tambe na Wimbledon. Awor e momento mas iconico for di e mercado di Reino Uni ta bira e vuelo di British Airways pa Aruba!

Den un encuesta reciente cu a midi comportacion di biahe di personanan na Reino Uni, 68% di participante a bisa cu nan a yega di tende di Aruba. Den e mesun encuesta, participantenan a comparti e criterionan di mas importante ora di sogé un destino pa

bishita. Limpiesa, seguridad, un entorno natural atractivo y personanan local cu ta demostra hospitalidad ta e criterionan principal. Na di 5 luga ta e acceso na vuelonan directo, algo cu awor lo haci Aruba mas accesibel y atractivo pa e mercado di Reino Uni. British Airways lo ta bendiendo vuelo pa Aruba pero tambe lo ta bendiendo paketenan a traves di British Airways Holidays y otro tour operadornan. A.T.A., AAA, Ministerio di Turismo y socionan e.o. hotelero ta sostiene e desaroyo aki mirando e contribucion cu esaki ta nifica pa Aruba su diversificacion y e oportunidad pa yega na socionan y clientenan nobo pa Aruba.

Na e momento aki ta trahando riba un campaña di concientisacion pa Aruba den e mercado, cual lo ser lansa banda di local ya ta coriendo den e mercado, incluyendo campaña intensivo cu British Airways. Hopi promocion adicional lo sigui durante e siguiente lunanan. A.T.A. ta agra decido na tur persona cu a contribui pa haci e vuelo aki un realidad. Na e ekipo di AAA, A.T.A. na Aruba y Europa, e Hunta di Supervision di A.T.A., Ministerio di Turismo, AHATA y hopi otro. Danki pa e apoyo, trabao duro y e confiansa den e ruta nobo aki. Pabien Aruba!



Accidente entre 3 auto

ORANJESTAD -- Diasabra mey anochi polis a bay poco pabou di Citgo Tanki Leendert, pa un accidente cu hende herida. Na yegada di patruxa di Playa tegenover di un supermercado tres

auto, nan tawata esunnan envolvi den e accidente.

E prome vehiculo tawata un Hyundai, cu segun informacion na e sitio ta esun cu a dal tras di un Toyota Vitz cu na su turno a bay dal un Nissan Tiida. Por a mira

cu e Hyundai cu a keda para cerca di e crusada ta esun cu a kibra mas. Ambulance a wordo pidi pa chauffeur di e Toyota Vitz, na yegada Paramediconan a bay atende cu ne.



STATIA/SABA/ST. MAARTEN

Konmemorashon 375 aña Tratado di Concordia

PHILIPSBURG – Djaweps a konmemorá 375 aña di Tratado di Concordia. Na e okashon akí, Promé Minister di St. Maarten, Silveria Jacobs, tabata presente i a bisa: “Mi ta pará dilanti boso ku mi ruman for di nort. Nos dos,

desendiente afrikano di e isla, kua famia tin relashon di generashon riku riba e suela akí, enkargá pa manehá nos pais na fabor i bos di e hende di St. Martin.”

Promé Minister a sigui bisa, trahando huntu pa sigurá nos relashon i ko-

munikashon ta keda fuerte, momentu ku rumannan ta bringa pa morto, un hende straño ta penetrá den estado di nan tata.

Esaki ta nos pais, nos kas, un lugá di nos di pasado i futuro generashonnan. Nos muchanan mester por

gosa di e pais akí. Esaki por logra solamente a base di koperashon i integrashon di ámbos parti di e isla.

Nos mester ta di akuerdo ku nos fronteranan ta

krea diskushon i tin mester atendé nan komo sugerensia, nos liña di guia, pero nunca mester resultá den divishon, Promé Minister Jacobs, a bisa.



Transporte pisá

PHILIPSBURG – Tin di Maneho di Kuepo Polisial St. Maarten, KPSM, ke ekstendé su sinsero gratitut na públiko en general i e part-

nernan enbolbí den transporte di e slùrfnan for di haf pa aeropuerto, e siman ku a pasa.

KPSM ta gradesidu pa e esfuerso di e agentenan i

otro kontribudónan, ku a atendé ku e tarea importante akí.

Henter e evento a bai sin ningun problema signifkante.



DEPORTE

Bosero Norison Conquet

ComCaBon a organisá kareda pa tene pueblo den moveshon

KRALENDIJK--Relashoná ku e promé edishon anual di “Bonaire International Sport Week” ku a keda organisá na Boneiru dor di diferente partnernan, Comcabon den su afán pa tene e pueblo di Boneiru den moveshon pa nos ta mas saludabel posibel, a organisá un kareda di pia.

E kareda di pia aki tabata tantu pa hende grandi pero tambe pa nos muchanan pasobra Comcabon ta kere fuertemente ku mas chikito nos kuminsá ku moveshon,

esaki ta mas mihó pa nos mes segun nos edat ta subi.

Tabatin 2 dia di inskripshon i na final a konta ku partisipashon di 39 adulto i 7 mucha, un total di 46 partisipante. E kareda pa e muchanan tabata di un distansia di 2KM i esun pa hoben i adulto nan tabatin un distansia di 5KM. Ambos kareda a start 8'or en punto.

Ruta di e muchanan a sali na ChaChaCha Beach subi J.A.Abraham Boulevard, Kaya International i a terminá na Stadion di

Playa.

E ruta di e hoben i adulto a kuminsá na Bon Bida Spa & Gym sigui riba Bulevar Gobernador. N. Debrot kore henter Malekon subi J.A.Abraham Boulevard, Kaya International i terminá na Stadion di Playa.

Durante e kareda tabatin pòst di awa i na final kada partisipante por a disfrutá di algu di bebe i fruta.

Comcabon kier a hasi uso di e oportunitat pa yama danki na tur e 46 partisipantenan, tambe un dan-

ki na e organisashonnan ku a bini huntu i hasi e promé edishon di e “Bonaire International Sport Week” aki posibel.

Finalmente Comcabon

kier a partisipá na tur koredónan pa kuminsá prepará e kurpa pa e kareda anual di Dia di Rincon.

Pronto nan lo duna mas informashon di esaki.



Resultado kareda ‘Bonaire International Sport Week’

KRALENDIJK -Komishon di Kareda pa Boneiru ku ta Comcabon fin di siman pasá den kuadro di e promé edishon anual di “Bonaire International Sport Week”, a organisá kareda a pia.

Aki ta sigui e resultadonan di e kareda.

Damas 2km.

8-11 jr Nova de Lange 16.45 Overall.

12-15 jr Kaylee Winklar 20.30.

Kabayero 2km.

8-11 jr Kenny Abrahamsz 14.02.

Ricard Thielman 14.38.

12-15 jr. Esteban Medina 11.28 Overall.

Damas 5km.

1. Josje Peters 23.20 Overall.

2. Ineke Knijp 26.48.

3. Angelica Morales 28.05.

19-30 jr. Ineke Knijp 26.48.

Nikki Edelbroek 37.16.

31-40 jr. Josje Peters 23.20.

Jacqueline Karsenberg 29.29.

41-50 jr. Angelica Morales 28.05.

Magdalena Morales 32.42.

Kabayero 5km.

Marc Bakker 21.31 Overall.

Pim Post 22.35.

Quirijn Huiskes 24.15.

19-30 jr Luuk van de Ven 27.52.

Menno van de Griendt 28.24.

31-40 jr. Marc Bakker 21.31.

Pim Post 22.35.

41-50 jr. Cassius Coffi 24.56.

Dairo Morales 27.45.

51+ Olav Beemsterboer 27.30.

Constantino Saragoza 32.32.

Igual ku Rishison Frans

Yurick Seinpaal 13 wega ku selekshon

KRALENDIJK--Informashon di Federashon Futbòl Boneriano – FFB pa loke ta hungadónan na kabes ku mesun kantidat di wega hungá ku nos selekshon nashonal.

Yurick Seinpaal tin 13 wega hungá ku nos selekshon nashonal meskos ku Rishison Frans.

T'asina di akuerdo ku e informashonnan di FFB, e hungadó Jurick Seinpaal, a añaadí un partido nobo internashonal i alkansá e promé posishon di kantidat di

wega hungá huntu ku Rishison Frans ku tambe tin mé sun kantidat di wega hungá ku nos selekshon nashonal di futbòl.

Aktualmente Yurick Seinpaal i Rishison Frans ta kompartiando e rekòrt di mas partido hungá (13 wega) den historia di nos selekshon.

Felisitashon di parti FFB ta bai na Jurick Seinpaal, por sierto tremendo hungadó goliadó di nos selekshon di futbòl di nos isla.



**Pa info i komunikado den
Extra/BONERIANO**

Redakshon:
extrabon@gmail.com
Aviso mail:
avisobon@gmail.com

CHANGAN WORKFORCE

3 YEAR
WARRANTY

M201 SEVEN SEATER



\$13,995

M401 ELEVEN SEATER



\$17,995

MS201 DOUBLE CABIN



\$15,995

M401 CARGO



\$14,995

MD201 FLAT BED



\$12,995

M201 CARGO



\$11,995

MD201 COOLING BOX



\$17,995

3 ANNIVERSARY
CHANGAN
ON BONAIRE

dabboussi
motors

f /dabboussimotors

786.6662